



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-801/01

Sarajevo, 13. decembra 2001.

Z A P I S N I K

sa 17. sjednice Predstavničkog doma Parlamentarne skupštine
Bosne i Hercegovine

Sedamnaesta sjednica održana je u dva dijela – 30. novembra i 13. decembra 2001. godine.

Prvi dio sjednice, 30. novembra, počeo je sa radom u 11,10 sati. Prisustvovalo je 36 poslanika. Odsustvo su opravdali Željko Mirjanić, Zoran Spasojević, Dušan Stokić i Adem Borić. Bez najave odsustvovali su Amor Mašović i Franjo Majdandžić.

Sjednici Doma, pored poslanika, prisustvovali su: Beriz Belkić, član Predsjedništva Bosne i Hercegovine, Zlatko Lagumdžija, predsjedavajući Vijeća ministara, Ante Domazet, Svetozar Mihajlović, Krešimir Zubak, ministri, te Jusuf Halilagić, Kadrija Haračić – Šabić, Nikola Kragulj, Gordana Ković i Muharem Imamović, zamjenici ministara, Jan Petter Holtedahl – politički savjetnik u OHR-u, Marsaili Fraser – ispred OSCE-a (Projekat podrške Parlamentu) i Mirsad Žiga ispred Američke ambasade u Bosni i Hercegovini.

Zbog odustva predsjedavajućeg sjednicom je predsjedavao mr. Mariofil Ljubić, prvi zamjenik predsjedavajućeg Doma.

U uvodu Mariofil Ljubić je upoznao poslanike da je došlo do izmjene u prijedlogu dnevnog reda koji su poslanici u pozivu za sjednicu dobili, što je konsenzusom dogovoreno na sjednici Proširenog kolegija neposredno pred sjednicu Doma, a to je uvrštavanje u dnevni red Izvještaja zajedničke komisije oba doma o postizanju sporazuma o jedinstvenom tekstu Zakona o zaštiti ličnih podataka i Izvještaja Ustavno-pravne komisije o amandmanima Doma naroda na Prijedlog zakona o udruženjima i fondacijama u Bosni i Hercegovini.

U diskusiji povodom prijedloga dnevnog reda poslanik Osman Brka predložio je da se u dnevni red uvrsti Izvještaj Komisije za ljudska prava, imigraciju, izbjeglice i azil o posjeti jednom broju opština u Bosni i Hercegovini.

Predsjedavajući sjednice obavijestio je da je razmatranje spomenutog izvještaja predviđeno za 18. sjednicu Doma, što je gospodin Brka prihvatio.

Drugih prijedloga u vezi s dnevnim redom nije bilo, pa je 17. sjednica Predstavničkog doma imala sljedeći

D N E V N I R E D:

1. Zapisnik sa 3. plenarne sjednice Predstavničkog doma i Doma naroda Parlamentarne skupštine Bosne i Hercegovine,
2. Poslanička pitanja i odgovori,

3. Prijedlog zakona o namjeni i korišćenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Bazelu,
4. Prijedlog izmjena i dopuna Budžeta institucija Bosne i Hercegovine i međunarodnih obaveza Bosne i Hercegovine za 2001. godinu (prvo čitanje),
5. Prijedlog zakona o izmjenama i dopunama Zakona o izvršenju Budžeta institucija Bosne i Hercegovine i međunarodnih obaveza BiH za 2001. godinu (prvo čitanje),
6. Izvještaj Zajedničke komisije o postizanju sporazuma o jedinstvenom tekstu Zakona o zaštiti ličnih podataka,
7. Izvještaj Ustavno-pravne komisije o amandmanima Doma naroda na Prijedlog zakona o udruženjima i fondacijama Bosne i Hercegovine,
8. Prijedlog zaključaka povodom razmatranja Informacije o aktivnostima institucija BiH u borbi protiv terorizma,
9. Razmatranje dokumenta “Opšti pravci i prioriteti za sprovođenje vanjske politike Bosne i Hercegovine”,
10. Informacija o aktivnostima Bosne i Hercegovine u Paktu stabilnosti za Jugoistočnu Evropu:
 - a) Informacija o aktivnostima na poslovima koordinacije sa Paktom stabilnosti,
 - b) Informacija o implementaciji Projekta iz paketa za brzi početak Pakta stabilnosti za Jugoistočnu Evropu,
 - c) Osnovni koncept aktivnosti Bosne i Hercegovine za vrijeme kopredsjedavanja radnim stolom II Pakta stabilnosti za Jugoistočnu Evropu,
11. Davanje saglasnosti za ratifikaciju:
 - a) Sporazuma o razvnojom kreditu (Projekat olakšanja trgovine i transporta u Jugoistočnoj Evropi) između Bosne i Hercegovine i Međunarodne asocijacije za razvoj,
 - b) Ugovora o finansiranju između Bosne i Hercegovine i Evropske investicione banke (Projekat za željeznice u Bosni i Hercegovini),
 - c) Ugovora o zajmu (Projekat rekonstrukcije elektroenergetskog sistema) između Bosne i Hercegovine i Evropske banke za rekonstrukciju i razvoj,
 - d) Ugovora o finansiranju između Evropske investicione banke i Bosne i Hercegovine (Projekat rekonstrukcije elektroenergetskog sistema u Bosni i Hercegovini),
 - e) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 1999. godini,
 - f) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2000. godini.

Ad. – 1: Zapisnik sa 3. plenarne sjednice Predstavničkog doma i Doma naroda Parlamentarne skupštine Bosne i Hercegovine

Poslanik Senad Šarganović prigovorio je da u Zapisnik nije uneseno da je i on imao diskusiju i prijedlog zaključaka u vezi s Informacijom o aktivnostima institucija Bosne i Hercegovine u borbi protiv terorizma.

Dom je jednoglasno usvojio Zapisnik s 3. plenarne sjednice Predstavničkog doma i Doma naroda Parlamentarne skupštine BiH, s primjedbom poslanika Šarganovića.

Ad. – 2: Poslanička pitanja i odgovori

Poslanička pitanja postavili su poslanici:

Violeta Kamberović:

Do kada će građani Posavke županije biti prinuđeni da se liječe u Mostaru?

Boro Bjelobrk:

1. Šta treba da se desi da bi dobio odgovore na niz pitanja od 19. maja 2001. godine pa do današnjeg dana, vezano za događaje u Banjoj Luci i Trebinju?

2. Tražim informaciju od predsjednika Republike Srpske, predsjednika Skupštine RS i predsjednika Vlade RS o sadržajima i dogovorima postignutim prilikom posjete Moskvi.

3. Tražim od ministra inostranih poslova informaciju o ovoj posjeti i predlažem da Komisija za vanjske poslove tu informaciju razmotri.

Senad Šarganović:

1. Kada će biti završena izgradnja graničnog prelaza Izačić? Kada će otpočeti izvođenje radova, obzirom da je tender završen?

2. Kada će biti u potpunosti pušten u funkciju granični prelaz Uzljebić – put Donji Lapac – Bihać?

3. Koja institucija i nivo vlasti BiH je nadležna da provjeri kako i na koji način su se na nivou opština i kantona zaposlili strani državljani bez državljanstva BiH i bez objavljenih konkursa? Primjer: regionalna bolnica u Bihaću, trenutno je ta bolnica u štrajku.

Sead Buturović:

Šta Federalna vlada, odnosno resorno ministarstvo za zdravstvo, čini ili planira da učini da ujedini zdravstvene kapacitete u gradu Mostaru?

Branislav Lolić:

1. Molim da Vijeće ministara dostavi pregled svih međunarodnih ugovora, a posebno kreditnih aranžmana koji čekaju na ratifikaciju Predstavničkog doma.

2. Molim da Vijeće ministara i Kolegij Predstavničkog doma pripreme pregled svih zakona koji su u parlamentarnoj proceduri, uz kratak opis problema koji koče stavljanje zakona na dnevni red našeg doma.

Abdurahman Malkić:

1. U kojoj je fazi i zašto još uvijek nismo dobili informaciju o prethodnom raspisivanju pa poništenom tenderu, a tiče se trećeg operatera?

2. Zašto se ne poštuje usvojeni Program rada Predstavničkog doma? Zašto zakoni iz oblasti saobraćaja i komunikacija nisu u proceduri i kad će biti?

Muhamed Begović:

Kakva je sudbina osam zakona koje sam kao ovlašteni predlagač predložio (zakoni iz oblasti saobraćaja)?

Ponovo pitao zašto nije dobio odgovor na svoja pitanja postavljena u mjesecu maju 2001. godine.

Ljubomir Kovačević:

Šta se misli preduzeti da se riješi kaos u saobraćaju na izlazu iz Sarajeva prema Doboju – slabo funkcioniše zimska služba.

Mirko Baković:

Vijeću ministara, a posebno vlastima Federacije BiH postavio – uputio zahtjev da se riješi problem ljudi iz Drvara u smislu nalaženja alternativnog smještaja ili omogućavanja povratka.

Ad. – 3: Prijedlog zakona o namjeni i korišćenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Bazelu

Uvodno izlaganje o Prijedlogu zakona, kao i o 4. i 5. tački dnevnog reda, podnio je ministar za trezor institucija BiH Ante Domazet.

Predsjedavajući Komisije za finansije i budžet, Emina Začiragić, obrazložila je izvještaj te komisije o razmatranju Prijedloga zakona.

U diskusiji su učestvovali: Muhamed Begović, Ljubomir Kovačević, Ramiz Vilić, Miloš Jovanović, Abdurahman Malkić, Branislav Lolić, Mustafa Cuplov, Sead Avdić, Mirko Banjac, Sead Buturović, Boro Bjelobrk i Željko Bilbija. Nakon diskusije poslanika govorili su predsjedavajući Vijeća ministara Zlatko Lagumdžija i ministar Ante Domazet.

Poslije ovih izlaganja, s 35 glasova ZA usvojen je Prijedlog zakona u prvom čitanju.

Zamjenik predsjedavajućeg Mariofil Ljubić predložio je da se Prijedlog zakona razmatra i u drugom čitanju, sa predloženim amandmanima. Prijedlog je prihvaćen jednoglasno.

Mariofil Ljubić je podsjetio na amandmane koje je razmatrala i usvojila nadležna komisija i koji su postali sastavni dio Prijedloga zakona. Kako nije bilo prijavljenih diskutanata dao je na glasanje amandman koji je predložio poslanik Mirko Banjac, a koji je prihvatilo Vijeće ministara, ali ga nije razmatrala nadležna komisija.

Amandman je usvojen jednoglasno sa 35 glasova prisutnih poslanika.

Potom je Dom jednoglasno usvojio Zakon o namjeni i korišćenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Bazelu.

Ad. – 4: Prijedlog izmjena i dopuna Budžeta institucija Bosne i Hercegovine i međunarodnih obaveza Bosne i Hercegovine za 2001. godinu (prvo čitanje)

Predsjedavajući sjednice Mariofil Ljubić podsjetio je poslanike da Prijedlog izmjena i dopuna Budžeta Dom razmatra u prvom i drugom čitanju.

Kako nije bilo diskusije u prvom čitanju, Dom je jednoglasno (u momentu glasanja prisutna 32 poslanika) usvojio Prijedlog izmjena i dopuna Budžeta institucija BiH i međunarodnih obaveza BiH za 2001. godinu u prvom čitanju. Potom je jednoglasno usvojen zaključak da se isti razmatra i u drugom čitanju.

Mariofil Ljubić je podsjetio da je nadležna Komisija za finansije i budžet usvojila amandmane poslanika Emine Začiragić i Abdurahmana Malkića.

U diskusiji u drugom čitanju učestvovali su Mirko Banjac i Abdurahman Malkić.

Poslije diskusije Dom je, sa 31 glasom ZA i jednim uzdržanim, usvojio Izmjene i dopune Budžeta institucija BiH i međunarodnih obaveza BiH za 2001. godinu.

Ad. – 5: Prijedlog zakona o izmjenama i dopunama Zakona o izvršenju Budžeta institucija Bosne i Hercegovine i međunarodnih obaveza BiH za 2001. (prvo čitanje)

Predstavnički dom je i Prijedlog zakona o izmjenama i dopunama Zakona o izvršenju Budžeta razmatrao u prvom i drugom čitanju.

Kako nije bilo diskusije ni u prvom ni u drugom čitanju, Dom je jednoglasno usvojio Zakon o izmjenama i dopunama Zakona o izvršenju Budžeta institucija Bosne i Hercegovine i međunarodnih obaveza Bosne i Hercegovine za 2001. godinu.

Ad. – 6: Izvještaj Zajedničke komisije o postizanju sporazuma o jedinstvenom tekstu Zakona o zaštiti ličnih podataka

Predstavnički dom je jednoglasno, bez diskusije, usvojio Izvještaj zajedničke komisije oba doma o postizanju sporazuma o jedinstvenom tekstu Zakona o zaštiti ličnih podataka. Predsjedavajući Ljubić je konstatovao da je ovim u Parlamentarnoj skupštini usvojen Zakon o zaštiti ličnih podataka.

Ad. – 7: Izvještaj Ustavno-pravne komisije o amandmanima Doma naroda na Prijedlog zakona o udruženjima i fondacijama Bosne i Hercegovine

Predstavnički dom je jednoglasno usvojio Izvještaj Ustavno-pravne komisije o amandmanima Doma naroda na Prijedlog zakona o udruženjima i fondacijama BiH.

Predsjedavajući je konstatovao da je ovim završena procedura i usvojen Zakon o udruženjima i fondacijama u Bosni i Hercegovini.

Ovim je (u 16,30 sati) završen rad prvog dijela sjednice.

Drugi dio 17. sjednice održan je 13. decembra 2001. godine s početkom u 11,25 sati. Predsjedavao je predsjedavajući Doma dr Željko Mirjanić. Prisustvovalo je 36 poslanika. Odsustvo su opravdali: Mirko Banjac, Zoran Spasojević, Mirko Mijatović i Tihomir Gligorić, a bez najave odsustvovao je Amor Mašović. Mediha Filipović je odsustvovala iz razloga što je stupila na dužnost ambasadora BiH u Švedskoj, a popuna njenog poslaničkog mjesta još nije izvršena.

Sjednica je nastavljena na 8. tački dnevnog reda.

Ad. – 8: Prijedlog zaključaka povodom razmatranja Informacija o aktivnostima institucija BiH u borbi protiv terorizma

Predsjedavajući je podsjetio poslanike na zaključak sa 3. plenarne sjednice oba doma po kojem su prijedlog zaključaka trebalo da sačine kolegiji oba doma. Pored ostalog, rekao je da je Kolegij Predstavničkog doma nekoliko puta inicirao da se održi zajednička sjednica oba doma na kojoj bi se razmatrali predloženi zaključci, ali da nije bilo razumijevanja od strane Kolegija Doma naroda. Napomenuo je da je pred poslanicima prijedlog zaključaka koji su kompromis u Kolegiju Predstavničkog doma. Potom je otvorio diskusiju o predloženim zaključcima.

O prijedlogu zaključaka nije bilo diskusije.

Predstavnički dom je jednoglasno usvojio predložene zaključke, čiji je sadržaj sljedeći:

1. Parlamentarna skupština Bosne i Hercegovine osuđuje terorističke napade na Sjedinjene Američke Države 11. septembra 2001. godine, kao i sve druge terorističke akte

uperene protiv tekovina demokratskog društva i pridružuje se Svjetskoj alijansi u borbi protiv terorizma.

2. Parlamentarna skupština Bosne i Hercegovine pozdravlja sve aktivnosti koje preduzimaju institucije Bosne i Hercegovine u aktivnoj borbi protiv terorizma i zadužuje Vijeće ministara da, u saradnji s entitetskim vladama, izradi dugoročnu strategiju borbe protiv terorizma.

3. Institucije Bosne i Hercegovine i entiteta će posebnu pažnju obratiti na borbu protiv raznih vidova organizovanog kriminala koji pogoduje nastajanju i širenju terorizma. To uključuje borbu na otkrivanju i sprječavanju terorističkih akata kao i otklanjanju stanja koja pogoduju nastanku i djelovanju terorizma.

4. Parlamentarna skupština Bosne i Hercegovine uložiće maksimalne napore za usvajanje zakona predviđenih Planom aktivnosti, kao i druge akte potrebne za efikasnu borbu protiv terorizma u okviru međunarodne aktivnosti antiterorističke alijanse.

Ad. – 9: Razmatranje dokumenta “Opšti pravci i prioriteti za sprovođenje vanjske politike Bosne i Hercegovine”

Uvodno izlaganje o dokumentu podnio je član Predsjedništva Bosne i Hercegovine Beriz Belkić.

Izvještaj Komisije za vanjske poslove o razmatranju dokumenta obzaložio je predsjedavajući te komisije Marko Amidžić. Posebno je detaljno obrazložio prijedlog zaključaka koje je Komisija predložila Domu na usvajanje.

Povodom ove tačke dnevnog reda diskutovali su: Željko Mirjanić, Željko Bilbija, Boro Bjelobrk, Ljubomir Kovačević, Franjo Majdandžić, Sead Avdić, Sead Buturović, Miloš Jovanović, Abdurahman Malkić, Mustafa Cuplov, Osman Brka, Senad Šarganović, Muhamed Begović, Miro Grabovac – Titan, Salih Kulenović, Mirko Baković i Adem Borić. Poslije diskusije govorili su zamjenik ministra vanjskih poslova Ivica Mišić i član Predsjedništva BiH Beriz Belkić.

U vezi sa zaključcima koje bi Dom trebao usvojiti povodom razmatranog dokumenta, diskutovali su Marko Amidžić, Mariofil Ljubić, Miloš Jovanović, Miro Grabovac, Zlatko Lagumdžija i Boro Bjelobrk.

Na kraju rasprave zaključeno je da Komisija za vanjske poslove, zajedno sa Kolegijem Doma, sačini prijedlog zaključaka, uzimajući za osnovu prijedlog zaključaka navedenih u Izvještaju Komisije za vanjske poslove, kao i prijedloge zaključaka iznesene u diskusiju. Tako sačinjen prijedlog zaključaka podnijeeće se na usvajanje Domu na 19. sjednici. U tom cilju Komisiji i Kolegiju dostaviće se magnetogram diskusije povodom dokumenta “Opšti pravci i prioriteti za sprovođenje vanjske politike Bosne i Hercegovine”.

Ad. – 10: Informacija o aktivnostima Bosne i Hercegovine o Paktu stabilnosti za Jugoistočnu Evropu:

- a) Informacija o aktivnostima na poslovima koordinacije sa Paktom stabilnosti,
- b) Informacija o implementaciji Projekta iz paketa za brzi početak Pakta stabilnosti za Jugoistočnu Evropu,
- c) Osnovni koncept aktivnosti Bosne i Hercegovine za vrijeme kopredsjedavanja radnim stolom II Pakta stabilnosti za Jugoistočnu Evropu.

Uvodno izlaganje podnio je zamjenik ministra za evropske integracije Rasim Kadić. Diskutovali su Željko Bilbija i Mustafa Cuplov.

Poslije diskusije predsjedavajući je konstatovao da je Predstavnički dom Informaciju primio k znanju, a da su kroz diskusiju Vijeća ministara dati određeni prijedlozi i sugestije.

Ad. - 11: Davanje saglasnosti za ratifikaciju:

- a) Sporazuma o razvojnom kreditu (Projekat olakšanja trgovine i transporta u Jugoistočnoj Evropi) između Bosne i Hercegovine i Međunarodne asocijacije za razvoj,
- b) Ugovora o finansiranju između Bosne i Hercegovine i Evropske investicione banke (Projekat za željeznice u Bosni i Hercegovini),
- c) Ugovora o zajmu (Projekat rekonstrukcije elektroenergetskog sistema) između Bosne i Hercegovine i Evropske banke za rekonstrukciju i razvoj,
- d) Ugovora o finansiranju između Evropske investicione banke i Bosne i Hercegovine (Projekat rekonstrukcije elektroenergetskog sistema u Bosni i Hercegovini),
- e) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 1999. godini,
- f) Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2000. godini

U okviru ove tačke diskutovao je poslanik Željko Bilbija. Pored ostalog, izrazio je iznenađenje što se na dnevnom redu nalazi sporazum koji je zaključen 1999. godine, pa je tim povodom predložio da se sporazumi razmatraju u kontinuitetu.

Izjašnjavajući se ponaosob o svim podtačkama od a) do f) Predstavnički dom je dao saglasnost za ratifikaciju svih razmatranih sporazuma i ugovora iz ove tačke dnevnog reda.

Ovim je iscrpljen dnevni red 17. sjednice.

Sjednica je s radom završila u 14,50 sati.

Sastavni dio ovog zapisnika je transkript 17. sjednice Predstavničkog doma.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Željko Mirjanić